

03 MAY 2001

DR MAHATHIR RAIKAN DIPLOMAT MALAYSIA PADA JAMUAN MALAM

PUTRAJAYA, 3 Mei (Bernama) -- Datuk Seri Dr Mahathir Mohamad meraikan para diplomat Malaysia yang bertugas di seberang laut pada jamuan malam di kediaman rasmi Perdana Menteri, Seri Perdana di sini, malam ini.

Jamuan itu diadakan sempena Persidangan Ketua-Ketua Perwakilan Malaysia di Seberang Laut yang majlis pembukaannya disempurnakan oleh Dr Mahathir siang tadi.

Persidangan lima hari itu turut meliputi pertemuan dengan beberapa Kementerian utama seperti Kementerian Pendidikan, Kewangan, Perdagangan Antarabangsa dan Industri, Kesihatan, sektor swasta serta lawatan ke Putrajaya dan Cyberjaya.

Yang turut hadir ialah isteri Perdana Menteri Datin Seri Dr Siti Hasmah Mohd Ali, Timbalan Perdana Menteri Datuk Seri Abdullah Ahmad Badawi dan isteri Datin Seri Endon Mahmood serta Menteri Luar Datuk Seri Syed Hamid Albar.

Dalam ucapannya siang tadi, Dr Mahathir berkata para diplomat Malaysia patut memainkan peranan yang lebih aktif memberi penjelasan mengenai dasar-dasar kerajaan kepada penuntut Malaysia di luar negara.

-- BERNAMA

MUN MAM PR